

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১১৮/২০১৭

ঢাকা, বৃহস্পতিবার ১৫ জুন ২০১৭, ১ আষাঢ় ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। প্রবাসীদের প্রতি দেশের ভাবমূর্তি বিরোধী কোনো কিছু না করার আহ্বান প্রধানমন্ত্রীর
- ২। ভূমিধসে ক্ষতিগ্রস্ত এলাকায় ত্রাণ তৎপরতার খোঁজখবর নেন প্রধানমন্ত্রী
- ৩। পাহাড় ধসে আহতদের চিকিৎসায় ৪৮৩টি মেডিকেল টিম গঠন : স্বাস্থ্য ও পরিবার কল্যাণমন্ত্রী
- ৪। রাস্তামাটির ক্ষতিগ্রস্ত মানুষদের পুনর্বাসনে সব সহযোগিতা করা হবে : সড়ক পরিবহণ ও সেতুমন্ত্রী
- ৫। ব্যাংক আমানতের ওপর আবগারি শুল্কের হার পরিবর্তন হতে পারে : অর্থমন্ত্রী
- ৬। ঢাকা নদীবন্দর এলাকায় ঈদের আগে-পরে পাঁচ দিন মালবাহী জাহাজ চলবে না : নৌপরিবহণমন্ত্রী
- ৭। তথ্যপ্রযুক্তিতে অবদানের জন্য ডার্লিউএসআইএস পুরস্কার লাভ বাংলাদেশের
- ৮। পাহাড় ধসে প্রাণহানিতে জাতীয় সংসদের শোক
- ৯। লন্ডনে একটি বহুতল আবাসিক ভবনে আগুন লাগার ঘটনায় প্রধানমন্ত্রীর দুঃখ প্রকাশ
- ১০। প্রধানমন্ত্রীর সঙ্গে যুক্তরাজ্যের পার্লামেন্ট নির্বাচনে জয়ী বাংলাদেশি বংশোদ্ভূত দুই কন্যার সাক্ষাৎ
- ১১। ভিয়েতনাম থেকে আড়াই লাখ মেট্রিক টন চাল আমদানি করবে সরকার
- ১২। মুঠোফোন সিমের তথ্য সংরক্ষণে চালু হচ্ছে কেন্দ্রীয় তথ্যভান্ডার

১। প্রবাসীদের প্রতি দেশের ভাবমূর্তি বিরোধী কোনো কিছু না করার আহ্বান প্রধানমন্ত্রীর

প্রধানমন্ত্রী শেখ হাসিনা যুক্তরাজ্যে বসবাসরত প্রবাসী বাংলাদেশিদের দেশের ভাবমূর্তি ক্ষুণ্ণ হয় এমন কিছু না করার আহ্বান জানিয়েছেন। তিনি বলেন, ‘এক সময় বাংলাদেশ ভিক্ষুকের দেশ, প্রাকৃতিক দুর্যোগ ও অন্যান্য খারাপ নামে পরিচিত ছিল। আমরা এসব পরিস্থিতি মোকাবিলা করে দেশকে উন্নয়নের রোল মডেলে পরিণত করেছি। কাজেই আপনারা এমন কিছু করবেন না যাতে দেশের ভাবমূর্তি ক্ষুণ্ণ হয়’। সুইডেন যাওয়ার পথে লন্ডনে যাত্রাবিরতির পর বাংলাদেশ কমিউনিটির নেতারা লন্ডনে স্ট্রীক পার্কে তাঁর সঙ্গে সাক্ষাৎ করতে গেলে তিনি তাদের উদ্দেশ্যে ভাষণকালে এ কথা বলেন। সূত্র-সংবাদ (শেষ পৃ.,ক.১), ইত্তেফাক (পৃ.১,ক.৬), নিউজ টুডে (পৃ.১,ক.৮), এশিয়ান এজ (শেষ পৃ.,ক.৭)। যায়যায়দিন, ইন্ডিপেনডেন্ট, নিউজ টুডে, অবজারভারসহ অধিকাংশ পত্রিকা এ বিষয়ে ছবিসহ খবর ছেপেছে।

২। ভূমিধসে ক্ষতিগ্রস্ত এলাকায় ত্রাণ তৎপরতার খোঁজখবর নেন প্রধানমন্ত্রী

সুইডেন সফররত প্রধানমন্ত্রী শেখ হাসিনা দেশের পার্বত্য জেলা সমূহে প্রবল মৌসুমি বৃষ্টিপাতের ফলে গত মঙ্গলবার ধারাবাহিক ভূমিধসে প্রাণহানি ও ক্ষয়ক্ষতির খোঁজখবর নেন। তিনি ক্ষতিগ্রস্ত জেলাসমূহে উদ্ধার ও পুনর্বাসন কার্যক্রম সম্পর্কে তাঁর মুখ্য সচিব ড. কামাল আব্দুল নাসের চৌধুরীর কাছ থেকে জানতে চান। প্রধানমন্ত্রীর মুখ্যসচিব গতকাল বুধবার রাঙ্গামাটি পার্বত্য জেলা পরিদর্শন করেন এবং প্রধানমন্ত্রীকে সর্বশেষ পরিস্থিতি সম্পর্কে অবহিত করেন। সূত্র-জনকণ্ঠ (পৃ.১,ক.৪), ইনকিলাব (পৃ.২,ক.৬), নিউজ টুডে (শেষ পৃ.,ক.১)।

৩। পাহাড় ধসে আহতদের চিকিৎসায় ৪৮৩টি মেডিকেল টিম গঠন : স্বাস্থ্য ও পরিবার কল্যাণমন্ত্রী

স্বাস্থ্য ও পরিবার কল্যাণমন্ত্রী মোহাম্মদ নাসিম বলেছেন, চট্টগ্রাম ও তিন পার্বত্য জেলায় পাহাড় ধসে আহতদের দ্রুত জরুরি চিকিৎসা নিশ্চিত করতে ৪৮৩টি মেডিকেল টিম গঠন করা হয়েছে। এসব টিমের সদস্যরা ক্ষতিগ্রস্ত এলাকায় গিয়ে প্রয়োজনীয় চিকিৎসা সেবার ব্যবস্থা করছেন। গতকাল সচিবালয়ে স্বাস্থ্য মন্ত্রণালয়ের সভাকক্ষে এক সংবাদ সম্মেলনে তিনি এ কথা বলেন। সূত্র-ইত্তেফাক (শেষ পৃ.,ক.৮), সমকাল (পৃ.২,ক.৫)।

৪। রাঙ্গামাটির ক্ষতিগ্রস্ত মানুষদের পুনর্বাসনে সব সহযোগিতা করা হবে : সড়ক পরিবহণ ও সেতুমন্ত্রী

রাঙ্গামাটির ক্ষতিগ্রস্ত মানুষদের পুনর্বাসনে সরকার সব রকম সহযোগিতা করবে বলে জানিয়েছেন সড়ক পরিবহণ ও সেতুমন্ত্রী ওবায়দুল কাদের। তিনি বলেন, প্রধানমন্ত্রী শেখ হাসিনার নির্দেশে আমি রাঙ্গামাটি এসেছি। রাঙ্গামাটির দুর্গত মানুষের জন্য সরকার সব রকম সহায়তা করবে। রাঙ্গামাটির ক্ষতিগ্রস্ত এলাকা পরিদর্শনকালে তিনি এসব কথা বলেন। তিনি রাঙ্গামাটি-চট্টগ্রাম সড়ক যোগাযোগ পুনরায় চালু ও রাঙ্গামাটি শহরে বিদ্যুৎ ও পানি সরবরাহ ব্যবস্থা চালু করতে দ্রুত কাজ করার জন্য সংশ্লিষ্টদের নির্দেশ দেন। সূত্র-ইত্তেফাক (শেষ পৃ.,ক.৫), সমকাল (পৃ.২,ক.৮)।

৫। ব্যাংক আমানতের ওপর আবগারি শুল্কের হার পরিবর্তন হতে পারে : অর্থমন্ত্রী

ব্যাংক আমানত ও লেনদেনের ওপর আবগারি শুল্কের হার পরিবর্তন হতে পারে বলে জানিয়েছেন অর্থমন্ত্রী আবুল মাল আবদুল মুহিত। তিনি বলেন, বিষয়টি নিয়ে সংসদে আলোচনা চলছে। আলোচনার পর এটি পরিবর্তন হতে পারে। গতকাল সচিবালয়ে সরকারি ক্রয় সংক্রান্ত মন্ত্রিসভা কমিটির বৈঠক শেষে তিনি একথা বলেন। সূত্র-সংবাদ (পৃ.১,ক.৫), সমকাল (শেষ পৃ.,ক.৫), নিউজ টুডে (পৃ.১,ক.১), ডেইলি স্টার বিজনেস পাতা (পৃ.১,ক.৫)।

৬। ঢাকা নদীবন্দর এলাকায় ঈদের আগে-পরে পাঁচ দিন মালবাহী জাহাজ চলবে না : নৌপরিবহণমন্ত্রী

ঈদের পাঁচ দিন আগে ও পাঁচ দিন পর পর্যন্ত ঢাকা নদীবন্দর এলাকায় মালবাহী জাহাজ ও বাস্কহেড চলাচল করতে পারবে না। গতকাল ঢাকা নদীবন্দরের সম্প্রসারিত টার্মিনাল ভবন, সদরঘাট হতে শূশানঘাট আরসিসি রাস্তা ও লালকুঠি মিনি পার্কের উদ্বোধন অনুষ্ঠানে নৌপরিবহণমন্ত্রী শাজাহান খান এ নির্দেশ দেন। মন্ত্রী বলেন, দক্ষিণাঞ্চলের

যাত্রীরা যেন নির্বিঘ্নে ও নিরাপদে বাড়ি যেতে পারেন এবং রাজধানীতে ফিরে আসতে পারেন, সে জন্য ব্যবস্থা নেওয়া হয়েছে। সূত্র-প্রথম আলো (পৃ.৩,ক.৫), সংবাদ (শেষ পৃ.,ক.৬), ইন্ডিপেনডেন্ট (পৃ.৩,ক.২), ডেইলি সান (পৃ.২,ক.১)।

৭। তথ্যপ্রযুক্তিতে অবদানের জন্য ডাব্লিউএসআইএস পুরস্কার লাভ বাংলাদেশের

বাংলাদেশ টানা চতুর্থবারের মতো তথ্যপ্রযুক্তির ক্ষেত্রে কৃতিত্বের জন্য বিশ্বের অত্যন্ত মর্যাদাপূর্ণ পুরস্কার ওয়ার্ল্ড সামিট অন দ্য ইনফরমেশন সোসাইটি-ডাব্লিউএসআইএস লাভ করেছে। এক সংবাদ বিজ্ঞপ্তিতে বলা হয়, প্রধানমন্ত্রীর কার্যালয়ের এক্সেস টু ইনফরমেশন (এটুআই) তার উদ্ভাবনী উদ্যোগ ‘মাল্টিমিডিয়া টকিং বুক’ প্রকল্পের জন্য এই পুরস্কার লাভ করে। এই প্রকল্প সকলের বিশেষ করে দৃষ্টি প্রতিবন্ধীদের জন্য শিক্ষার সুযোগ করে দিয়েছে। অপর যে তিনটি প্রকল্প ডাব্লিউএসআইএস চ্যাম্পিয়ন্স পুরস্কার অর্জন করেছে সেগুলো হলো ‘নথি (ই-ফাইলিং সিস্টেম)’, ‘ইউস অব সোস্যাল মিডিয়া ইন পাবলিক সার্ভিস ডেলিভারি’ ও ‘রুরাল এন্টারপ্রেনারশিপ মডেল বেজড টেলিমেডিসিন প্রজেক্ট’। প্রধানমন্ত্রীর কার্যালয়ের মহাপরিচালক (প্রশাসন) ও এটুআই কর্মসূচির প্রকল্প পরিচালক কবির বিন আনোয়ার গত ১৩ জুন মঙ্গলবার জেনেভায় আন্তর্জাতিক টেলিযোগাযোগ ইউনিয়ন সদর দফতরে এই পুরস্কার গ্রহণ করেন। সূত্র-সংবাদ (পৃ.২,ক.৭), নিউজ টুডে (পৃ.৩,ক.২), এশিয়ান এজ (শেষ পৃ.,ক.৬)।

৮। পাহাড় ধসে প্রাণহানিতে জাতীয় সংসদের শোক

পাবর্ত্য এলাকা চট্টগ্রাম, রাঙ্গামাটি ও বান্দরবান জেলায় ভয়াবহ পাহাড় ধসে শতাধিক ব্যক্তির প্রাণহানিতে শোক জানিয়েছে জাতীয় সংসদ। একই সঙ্গে আহতদের দ্রুত আরোগ্য ও সুস্থতা কামনা করা হয়। গতকাল সকালে অধিবেশনের শুরুতেই সংসদের পক্ষ থেকে শোক জানান স্পিকার ড. শিরীন শারমিন চৌধুরী। সূত্র-ইনকিলাব (পৃ.১,ক.৫), সমকাল (পৃ.১৯,ক.৫), নিউজ টুডে (পৃ.৩,ক.৪), ডেইলি স্টার (শেষ পৃ.৩,ক.৫)।

৯। লন্ডনে একটি বহুতল আবাসিক ভবনে আগুন লাগার ঘটনায় প্রধানমন্ত্রীর দুঃখ প্রকাশ

প্রধানমন্ত্রী শেখ হাসিনা লন্ডনে একটি বহুতল আবাসিক ভবনে আগুন লাগার ঘটনায় গভীর দুঃখ প্রকাশ করেছেন। প্রধানমন্ত্রী শেখ হাসিনা বৃটিশ প্রধানমন্ত্রী থেরেসা মে এমপি’র কাছে পাঠানো এক বার্তায় পশ্চিম লন্ডনে ২৪ তলা গ্রীনফেল টাওয়ারে ভয়াবহ আগুনের ঘটনায় তাঁর দুঃখ ভারাক্রান্ত হওয়ার কথা উল্লেখ করেন। ফায়ার সার্ভিসের আপ্রাণ প্রচেষ্টায় এ দুর্ঘটনায় ক্ষয়ক্ষতির পরিমাণ হ্রাস পাবে বলে বার্তায় কামনা করেন প্রধানমন্ত্রী। তিনি আহতদের দ্রুত আরোগ্য কামনা করেন। তিনি এই সংকটকালে বৃটিশ প্রধানমন্ত্রী ও তাঁর সরকারের প্রতি গভীর সমবেদনা জানিয়ে বলেন, আমরা ক্ষতিগ্রস্ত পরিবারগুলোর সাথে সমভাবে ব্যথিত। সূত্র-ইত্তেফাক (পৃ.১,ক.৮), সংবাদ (পৃ.২,ক.৭), নিউ এজ (শেষ পৃ.,ক.১), এশিয়ান এজ (পৃ.১,ক.৪)।

১০। প্রধানমন্ত্রীর সঙ্গে যুক্তরাজ্যের পার্লামেন্ট নির্বাচনে জয়ী বাংলাদেশি বংশোদ্ভূত দুই কন্যার সাক্ষাৎ

নবনির্বাচিত লেবার পার্টি কমন্স সভার সদস্য টিউলিপ রেজওয়ানা সিদ্দিক ও রুশনারা আলী প্রধানমন্ত্রীর সঙ্গে তাঁর হোটেল কক্ষে সৌজন্য সাক্ষাৎ করেন। প্রধানমন্ত্রী তাঁদের অভিনন্দন জানান। সূত্র-সংবাদ (পৃ.২,ক.৫), ইত্তেফাক (পৃ.১৯,ক.৩), ইত্তেফাক, জনকণ্ঠ, সংবাদ, প্রথম আলো, ডেইলি সান, নিউ নেশন, ডেইলি স্টার, এশিয়ান এজসহ অধিকাংশ পত্রিকা এ বিষয়ে ছবিসহ খবর ছেপেছে।

১১। ভিয়েতনাম থেকে আড়াই লাখ মেট্রিক টন চাল আমদানি করবে সরকার

দেশে খাদ্য ঘাটতি মেটাতে দরপত্র ছাড়াই ভিয়েতনাম থেকে ৯০৮ কোটি ৮৫ লাখ টাকা ব্যয়ে আড়াই লাখ মেট্রিক টন চাল আমদানির প্রস্তাব অনুমোদন দিয়েছে সরকারি ক্রয় সংক্রান্ত মন্ত্রিসভা কমিটি। গতকাল সচিবালয়ে অর্থমন্ত্রী আবুল মাল আবদুল মুহিতের সভাপতিত্বে সরকারি ক্রয় সংক্রান্ত মন্ত্রিসভা কমিটির বৈঠকে চাল আমদানির এই প্রস্তাব অনুমোদন দেওয়া হয়। সূত্র-ইনকিলাব (পৃ.১,ক.৫), সংবাদ (শেষ পৃ.,ক.৩), নিউজ টুডে (পৃ.১,ক.৪), ডেইলি স্টার (শেষ পৃ.,ক.১)।

১২। মুঠোফোন সিমের তথ্য সংরক্ষণে চালু হচ্ছে কেন্দ্রীয় তথ্যভান্ডার

মুঠোফোন সিমের তথ্য সংরক্ষণ ও যাচাই-বাছাইয়ের জন্য কেন্দ্রীয় তথ্যভান্ডার চালু করা হচ্ছে আজ বৃহস্পতিবার। 'সেন্ট্রাল বায়োমেট্রিক ভেরিফিকেশন মনিটরিং প্ল্যাটফর্ম' নামের এই তথ্যভান্ডারে আঙুলের ছাপ বা বায়োমেট্রিক পদ্ধতিতে নিবন্ধিত সব সিমের তথ্য জমা থাকবে। বাংলাদেশ টেলিযোগাযোগ নিয়ন্ত্রণ কমিশন (বিটিআরসি) এই তথ্যভান্ডার পরিচালনা করবে। নতুন এই ব্যবস্থা চালু করতে আজ বৃহস্পতিবার রাত থেকে শুক্রবার দুপুর পর্যন্ত ১৮ ঘণ্টা সিম বিক্রি কার্যক্রম বিঘ্নিত হতে পারে। সচিবালয়ে গতকাল বুধবার আয়োজিত এক সংবাদ সম্মেলনে এসব তথ্য জানান ডাক ও টেলিযোগাযোগ প্রতিমন্ত্রী তারানা হালিম। সূত্র-প্রথম আলো (পৃ.১০,ক.১), সংবাদ (শেষ পৃ.,ক.৫), ডেইলি স্টার বিজনেস পাতা (পৃ.১,ক.৪), এশিয়ান এজ (পৃ.১১,ক.৬)।

সম্পাদকীয়

- ক. ইত্তেফাক, জনকণ্ঠ, সংবাদ, সমকাল, প্রথম আলো, যুগান্তর, ইনকিলাব, যায়যায়দিন, ইন্ডিপেনডেন্ট, ডেইলি সান, ডেইলি স্টার, নিউজ টুডে, নিউ নেশন, নিউ এজ : কয়েকদিনের টানা বর্ষণে পার্বত্য জেলা রাজ্জামাটি, বান্দরবান ও চট্টগ্রামে পাহাড় ধসে শতাধিক নিহত হওয়ায় শোক প্রকাশ করে পাহাড় ধস প্রতিরোধে যত্রতত্র পাহাড় কাটার প্রবণতা বন্ধ করার পাশাপাশি পাহাড়ে সুপারিকল্পিতভাবে নিরাপদ বসতি গড়ে তোলার ওপর গুরুত্বারোপ।
- খ. সংবাদ : সরকারি দফতরগুলোর মোট পদের এক-চতুর্থাংশ খালি থাকায় প্রশাসনে কাজের গতি কমে যাওয়ায় সাধারণ মানুষের ভোগান্তির বিষয় তুলে ধরে এসব শূন্য পদে দ্রুত নিয়োগ কার্যক্রম শুরু করার সুপারিশ।
- গ. জনকণ্ঠ : দ্রুত পরিবর্তনশীল বর্তমান বিশ্বের চ্যালেঞ্জ মোকাবিলা করে দেশকে উন্নয়ন ও সমৃদ্ধির দিকে নিয়ে যেতে শিক্ষার কোনো বিকল্প নেই বলে মন্তব্য।
- ঘ. যুগান্তর : আউশের ভরা মৌসুমে কুষ্টিয়া-বিনাইদহের ডিলাররা ১৩ দিন ধরে গুদাম থেকে সার তুলতে না পারার কারণে কৃষক সময়মতো সার না পেলে আউশ উৎপাদন মারাত্মকভাবে ব্যাহত হবে উল্লেখ করে এ দুই জেলার পাশাপাশি সারা দেশের সব সার গুদাম থেকে ডিলারদের কাছে নিরবচ্ছিন্নভাবে সার সরবরাহ নিশ্চিত করার সুপারিশ।
- ঙ. যায়যায়দিন : বাংলাদেশের জলাশয় থেকে বিলুপ্তপ্রায় ২২ প্রজাতির মিঠাপানির মাছ ফিরে আসার খবর ইতিবাচক বলে উল্লেখ করে মাছের প্রজাতি বিলুপ্তির হাত থেকে রক্ষা করতে পরিকল্পিত পদক্ষেপ গ্রহণ ও তার সূষ্ঠা বাস্তবায়ন নিশ্চিত করার বিকল্প নেই বলে মত প্রকাশ।
- চ. ইন্ডিপেনডেন্ট : সোলার পাওয়ারের ব্যবহার বৃদ্ধির মাধ্যমে গ্যাসের ওপর চাপ কমিয়ে উদ্ভূত গ্যাস অন্য উৎপাদনশীল খাতে ব্যবহারের ব্যাপারে জনগণকে সচেতন করে তোলার ওপর গুরুত্বারোপ।
- ছ. ডেইলি সান : ১ জুলাই থেকে নিউজপেপারে বিজ্ঞাপনের ওপর ১৫ শতাংশ ভ্যাট ও নিউজপেপারের কাঁচামাল আমদানির ওপর ১৫ শতাংশ ভ্যাট কার্যকর হলে তা নিউজপেপার শিল্পের জন্য বোঝা হয়ে পড়ার আশঙ্কা বিবেচনায় নিয়ে এই শিল্প থেকে ভ্যাট প্রত্যাহার করার সুপারিশ।
- জ. ডেইলি স্টার : ঈদে ঘরমুখো মানুষের যাত্রা নিরাপদ করতে সড়ক মহাসড়কগুলো সংস্কার করে যান চলাচল নির্বিঘ্ন করার আহ্বান।
- ঝ. নিউ এজ : যাত্রীদের কাছ থেকে অটোরিক্সার ভাড়া মিটারের চেয়ে অনেক বেশি আদায় করায় সড়ক পরিবহন কর্তৃপক্ষকে গ্যাসের বর্ধিত মূল্যের সাথে সমন্বয় করে ভাড়া পুনঃনির্ধারণ করে দেওয়ার সুপারিশ করে সম্পাদকীয় প্রকাশ করেছে।

উপ-সম্পাদকীয়

আমাদের সময় পত্রিকায় প্রকাশিত কলামে উল্লেখ করা হয়েছে, একটি দেশের শিক্ষা ব্যবস্থার ভিত শক্তিশালী করতে মানসম্পন্ন পাঠ্যক্রম প্রণয়ন প্রয়োজন।

নিবন্ধ ও ফিচার

সংবাদ পত্রিকায় প্রকাশিত 'নিম্ন আয়ের মানুষের জন্য প্রয়োজন পরিকল্পিত আবাসন ব্যবস্থা' শিরোনামের নিবন্ধে অভিমত প্রকাশ করা হয়েছে, ঢাকার বাইরে শিল্প প্রতিষ্ঠান ও গার্মেন্টস ফ্যাক্টরিগুলো স্থানান্তর করা হলে রাজধানীতে বড় বড় বস্তি তৈরি হতো না।

#

ফাহিমা/শুকলা/মরজিনা/সাইদা/রশীদ/তানিয়া/২০১৭/৯.০০ ঘণ্টা

